

# LETTR E DV ROY,

SVR LA DETENTION DES PRINCES  
DE CONDE' ET DE CONTY,  
& Duc de Longueville.

*Enuoyée au Parlement le 20. Janvier. 1650.*



A P A R I S,

Par les Imprimeurs & Libraires ordinaires de sa Majesté,

---

M. DC. L.

*Avec Privilège de sa Majesté.*





LETTRE DV ROY,  
SVR LA DETENTION DES  
Princes de Condé & de Conty, & Duc  
de Longueville,

*Enuoyée au Parlement le 20. Ianvier 1650.*

**N**OS AMEZ ET FEAUX: La resolution que nous auons esté forcez de prendre par l'aduis de la Reyne Regente nostre tres-honorée Dame & Mere, de nous asseurer des personnes de nos Cousins les Princes de Condé & de Conty, & Duc de Longueville, est si importante pour le bien de nostre seruice, qu'encore que nous ne deuions qu'à Dieu seul le compte de nos actions & de l'administration de nostre Estat; Nous auons creu neantmoins ne pouoir trop tost vous en faire sçauoir les motifs, & au public, afin que tous nos sujets estans informez de la necessité absoluë où nous nous sommes trouuez par la conduite desdits Princes & Duc d'en venir iusques-là, pour preuenir des maux irreparables qui menaçoient cette Monarchie, chacun redouble son affection & concoure en ce qui dépendra de ses soins & de son pouuoir au but que nous nous proposons de reestabliir vn ferme repos au dedans de l'Estat, ayans mesme reconnu par experience que c'est l'vniue moyen de porter à la raison nos ennemis, qui ne se rendent difficiles à la conclusion de la Paix que dans l'attente où ils sont que les diuisions qui ont agité depuis quelque temps



3

cét Estat, y causeront enfin vn bouleuerfement general, dont nous esperons, avec l'assistance de Dieu, de le garentir. Nous nous promettons que le souuenir qu'aura toute la Chrestienté de nostre moderation, & de la douceur des conseils que nous auons suivis depuis nostre auenement à la Couronne, (qui a esté telle, que souuent mesme on a imputé à foiblesse dans le gouuernement, ce qui ne parloit que de nostre pure bonté, ou de prudence pour d'autres raisons plus fortes,) persuadera aisément vn chacun que nous n'auons eu recours au dernier remede, qu'apres auoir éprouué que tous les autres estoient impuissans: Et à la verité, quand il a fallu deliberer sur l'arrest d'un Prince de nostre Sang que nous auons tousiours tendrement aimé, & qui est d'ailleurs estimable pour beaucoup de hautes qualitez qu'il possède, d'un Prince qui a remporté plusieurs victoires sur nos ennemis, où il a signalé son courage: Il est certain qu'encore qu'il ait malvse d'abord de la gloire particuliere que nous luy auons donné moyen d'acquérir, & que son procedé en diuerses entreprises qu'il a faites nous aient tout temps donné de justes desiances de ses desseins; Nous n'auons pû neantmoins sans vne repugnance extrême nous determiner à resoudre sa détention, & nous aurions encore dissimulé tout ce qu'il y auoit de mal en sa conduite à moins d'un peril imminent de voir deschirer cet Estat: & à moins d'auoir comme touché au doigt que dans le chemin qu'auoit pris ledit Prince, & où il s'auancoit tous les iours à grands pas, l'un de deux maux estoit ineuitable, ou sa perte sans ressource, ou la dissipation de cette Monarchie dans la ruine de nostre autorité, de la conseruation de laquelle depend principalement le repos & le bonheur des peuples que Dieu a soumis à nostre obeissance; Il est si naturel à tous les hommes d'aymer leurs ouurages, & d'en vouloir autant qu'il se peut conseruer le gré & le merite que personne sans doute ne pourra presumer qu'ayant donné matiere à nostre dit Cousin par les emplois de guerre que nous luy auons confiez d'acquérir vne haute reputation, & ayant aussi comblé sa maison & sa personne de bien faits de toute nature, nous eussions pû nous porter sans vne derniere necessité à perdre le fruct de toutes ces graces, & à nous priver des seruices que nostre dit Cousin eust pû continuer à nous rendre, & par ses conseils & par ses actions en des temps difficiles, comme sont ordinairement ceux d'une longue minorité, s'il ne se fust pas tant écarté qu'il a fait du chemin de son deuoir, & qu'il eust pû moderer son ambition à se contenter de viure le plus riche sujet qui soit aujourd'huy dans la



Chrestienté : Et certes si on considere les grands establissemens qui sont dans sa maison, soit en charges, ou en gouuernemens de Prouinces, ou de places, ou en fonds de terres, ou en argent, ou en biens d'Eglise, on auoiera que iamais il n'a esté versé, ny en si peu de temps dans vne mesme maison, ny tant de graces, ny de si considerables que nous en auons faict depuis nostre aduenement à la Couronne, à nostredit cousin, sans mesme mettre en compte tout ce que nous auons accordé à ses proches & à ses amis pour sa consideration & à sa priere. Il ne peut pas nier qu'il ne tienne de nostre liberalité seule, tout ce qu'il possède auourd'huy de charges, ou de gouuernemens, puisque tout auoit vacqué par la mort de feu nostre tres-cher Cousin le Prince de Condé son pere, & qu'il fut alors en nostre plaine liberté d'en disposer en faueur de telles autres personnes que nous aurions voulu gratifier preferablement à luy. Mais pour reprendre la chose de plus haut, Chacun peut se souuenir comme dès que la Reine Regente nostre tres-honorée Dame & Mere, preuid le mal-heur dont le Ciel vouloit affliger la France par la perte du feu Roy nostre tres-honoré Seigneur & pere, & que l'on n'espera plus rien du recouurement d'une santé si precieuse à l'Estat ; Elle s'appliqua particulierement à gaigner l'affection de nosdits Cousins, en ordonnant aussi-tost qu'elle fut designée Regente dans l'esprit du Roy, à ceux en qui ce grand Prince prenoit le plus de confiance, d'agir près de luy, pour le porter à faire diuerses graces à toute la maison. Ses ordres furent si heureusement executez, que nonobstant que le Roy crût auoir desja fait beaucoup pour elle, ayant mis peu de temps auant cela le Duc d'Anguien à la teste de sa principale armée ; ( A quoy il auoit eu d'abord tant de repugnance, qu'il auoit mesme deliberé de le faire retirer en Bourgogne : ) On ne laissa pas de luy persuader encore de faire vn honneur à feu nostre dit Cousin le Prince de Condé qu'il auoit tousiours extraordinairement souhaitté qui fut de l'appeller dans ses Conseils pour y exercer mesme la fonction de Chef. Et à quelques iours de là, il fut pourueu encore de la charge de Grand Maistre de France, quoy que le Roy comme chacun sçait, eust resolu de la supprimer entieremēt. La Reine en suite dès les premiers iours de sa Regence, luy donna en nostre nom les maisons de Chantilli & de Dampmartin, ce qui fit dire dès lors à tous ceux qui auoient veu Chantilli, que c'estoit le plus beau present que iamais aucun Roy eust fait à vne seule personne : On luy permit en outre d'achepter les biens de feu nostre Cousin le Duc



5

de Bellegarde, où la place de Bellegarde se trouuoit comprise, qui pour son importance propre & à l'esgard des autres Gouvernemens de nostredit Cousin, estoit celle de tout le Royaume qui estoit le plus à sa bien-seance, & qu'il auoit le plus desirée. Et quoy que tant de graces & qui estoient extraordinaires, estant accordées au pere, ne fussent pas moins aduantageuses au fils qui en receuoit tout le fruit, la Reyne eut la bonté d'en vouloir departir encore de tres-considerables à la personne du Duc d'Anguien: On donna à nos despens à nostre Cousin le Marechal de l'Hospital la recompense du Gouvernement de Champagne, & pour y joindre vne place, on reeompensa au sieur de Thibault le Gouvernement des Ville & Citadelle de Stenay, & l'un & l'autre furent donnez en mesme temps audit Duc: A la mort de feu nostre Cousin le Prince de Condé, nous donnasmes en vn seul jour à sa Maison la Charge de Grand Maistre de France, les Gouvernemens de trois Prouinces, la Bourgogne, la Bresse & le Berry, outre celuy de Champagne qu'elle auoit desia, & trois places fortes, le Chasteau de Dijon, Saint Iean de Latune, & Bourges, outre Bellegarde & Stenay dont elle estoit en possession. Nous auions tout suiet de croire qu'il n'y auoit point d'auidité de posseder ou de s'agrandir, qui ne deust estre plainement assouuie par vne si grande effusion de bien-faits de toute nature: Et nostredit Cousin nous donna pour lors des assurances formelles de ne iamais rien pretendre à l'aduenir, aduoiant & publiant luy-mesme, que quelques seruices qu'il eust rendus, ou qu'il peust encor rendre à l'Estat, il ne pouuoit rien demander raisonnablement au delà de ce que nous auions desia fait pour son aduantage. Cependant, il ne s'escoula guere de temps qu'il ne mist en auant d'autres grandes pretentions, sur des pretextes mandiez & iniustes, renouuellant pour mieux paruenir à ses fins le mescontentement qu'il auoit tesmoigné vn an auparauant, de ce que nous auions pourueu la Reyne nostre tres-honorée Dame & Mere, de la Charge de Grand Maistre, Chef & Sur-Intendant general des Mers, nauigation & commerce de France, qui auoit vacqué par la mort de nostre Cousin le Duc de Brezé son beau-frere, comme s'il eust eu vn priuilege particulier de rendre hereditaires dans sa Maison toutes les Charges que ses parents auroient possedées pendant leur vie: Ne voulant pas se souuenir mesme qu'il s'estoit positiuement départy de nous rien demander sur le fait de ladite Charge, lors que nous le gratifiasmes de tant d'autres, & qui estoient si considerables par la mort de son pere qui suiuit de



prez celle du Duc de Brezé. Avec tout cela nous resolumes de  
 faire encor vn dernier essay de le contenter, esperant tousiours que  
 l'âge tempereroit ses excez & son ardeur immodérée de s'éleuer.  
 Et afin de luy oster vne fois pour toutes, par quelque grande gra-  
 ce toute occasion d'en demander d'autres, nous comblasmes la  
 mesure de tout point, & sur les promesses qu'il nous renouuella  
 de ne iamais rien pretendre, Nous luy accordasmes vn nouveau  
 bien-fait qui surpassoit en quelque façon tous les autres, qui fut  
 d'adjouster à toutes les places de Bourgongne & du Berry qu'il  
 auoit desia & à Stenay, celle de Clermont avec le don en propre  
 de tout le Domaine, & de ceux de Stenay & de lamets, qui valent  
 bien prez de cent mille liures de rente. Nous auons depuis cela  
 accordé à nostre Cousin le Prince de Conty l'entrée dans nos Con-  
 seils à l'âge de vingt ans (quoy que son frere & son beau frere l'y  
 eussent desia) cent mil liures de pension, la place de Damvilliers,  
 dont il a fallu donner recompense au sieur Danevoux qui en estoit  
 pourueu, & estably sous son nom diuers Corps de troupes de ca-  
 ualerie & d'infanterie: Nous ne parlons point de tant d'autres di-  
 uerses graces que nous auons continuellement départies à nostre  
 Cousin le Prince de Condé, & capables seules de satisfaire plain-  
 ment tout esprit tant soit peu réglé, comme de sommes d'argent  
 considerables que nous luy auons données châce année, & tou-  
 tes les augmentations de pensions pour luy ou pour sa famille, &  
 pour ses proches qu'il a demandées. Nous ne parlons point de la  
 consideration que nous auons tousiours faite de ses prieres, des  
 Breuets de Ducs, des promotions de Mareschaux de France, de  
 tant d'emplois de guerre, de tant de Charges militaires, & autres  
 de toute nature, les Abbayes & Eueschez, & de diuers Gouverne-  
 ments de Places donnez sur sa recommandation, à des personnes  
 qui s'attachent à luy. Enfin, Nous appellons Dieu à tesmoin, qu'il  
 n'y a diligence imaginable que nous n'ayons pratiquée & à son  
 égard, & avec ceux qui pouuoient auoir quelque part dans sa con-  
 fidence pour fixer son esprit & pour le contenter. Et sur ce sujet  
 nous sommes obligez de tesmoigner que nostre tres cher & tres-  
 aimé Oncle le Duc d'Orleans, preferant le repos de l'Estat & le bien  
 de nostre seruice à tout autre interest & consideration particulie-  
 re, nous a luy mesme portez tousiours dans ces sentimens, & contri-  
 bué beaucoup par ce moyen aux auantages dudit Prince & à tou-  
 tes ses satisfactions. Mais tout a esté inutile, nulle grace, nulle  
 application, nulle confiance n'ayant esté capable de mettre des



bornes au déreglement de son ambition. La nature de diuerſes preſentations qu'il a mis en auant de fois à autre, & dont on a taſché de ſ'exempter avec douceur & prudence, pourra faire iuger qu'elles eſtoient les penſées & les emportemens de cét eſprit. Tantost il a inſiſté fortement à ſe faire donner vne armée pour aller conquerir la Franche-Comté, à condition qu'il la poſſederait apres ſouuerainement: tantost que nous luy donnaſſions Graue-line, Donkerque & toutes les conqueſtes que nos armes ont faites en Flandres du coſté de la mer en pluſieurs années, pour les poſſeder auſſi en Souueraineté. Au milieu de la campagne derniere, pendant que noſtre armée eſtoit auancée dans la Flandre, & qu'on ne pouuoit l'affoiblir ſans luy faire courir riſque de receuoir quel- que grand eſchec: il pretendit qu'abandonnant toute autre viſée d'incommoder les Ennemis, & au hazard meſme d'expoſer nos Frontieres & nos places à leurs inſultes & à leurs attaques, on deſtachast de noſtre dite armée vn grand Corps de caualerie pour aller du coſté du Liege, appuyer le deſſein qu'il auoit de porter le Prince de Conty ſon frere, à la Coadjutorerie de cét Eueſché-là, afin de rendre par ce moyen plus conſiderables les places qu'il a ſur la Meuſe & le Gouuernement de Champagne: Outre vn plus grand eſtabliſſement qu'il projettoit de prendre de ce coſté-là, comme nous dirons cy-apres. Tout cela fait voir clairement par beaucoup de circonſtances remarquables, à quel point il eſtoit poſſédé du deſir de la Souueraineté. Penſée d'autant plus dangereuſe en vn eſprit tout de feu comme eſt le ſien, que nous ſommes d'ailleurs bien informez qu'il a eu ſouuent dans la bouche, parlant à ſes confidens, la pernicieuſe maxime, qu'on peut tout faire pour regner. Bien que dans vne Monarchie eſtablie ſur des fondemens auſſi ſolides qu'eſt la noſtre, & principalement ſur l'amour, & ſur la fidelité inſbranlable que tous les François ont naturellement pour les droits & pour la perſonne de leurs Roys, vne penſée ſi criminelle que celle-là, ait preſque touſiours eſté ſuiuie du chaſtiment ou de la ruine de ceux qui l'ont eue: ce ſeroit manquer à ce que nous deuons tant à nous-meſmes, qu'à nos fidels Sujets de n'aller pas au deuant de tout ce qui pourroit rendre faciles avec le temps, les moyens d'executer vn ſi iniuſte projet. Car quand meſme les propos qu'il en a tenus, n'auroient pas eſté vne marque de ce qu'il auoit dans l'ame, il eſt certain qu'à examiner de près toute ſa conduite depuis noſtre aduenement à la Couronne, perſonne ne ſçauroit deſauouer qu'il n'ait eu vne intention toute formée de



faire d'autres maux dans l'Estat, qui ne requierent pas moins le remede que nous venons d'y appliquer, puis qu'il alloit ouuertement à l'establissement d'une Puissance qui nous fust redoutable : Que son dessein estoit d'affoiblir & de mettre si bas l'autorité Royale, que s'emparant ou s'assurant par diuers moyens des principales places du Royaume, & s'attachant par obligation, par crainte ou par intérêt toutes les personnes qui ont du credit ou quelques bonnes qualitez, il pust après en tout temps résister hautement à tout ce qui seroit de nostre vouloir quand il ne seroit pas conforme au sien : Ietter impunément le trouble & la guerre dans l'Estat selon les interets ou les caprices ; Profiter de toutes les occasions qui s'offriroyent d'agrandir encore sa fortune : Et enfin à le bien prendre qu'il pust pendant nostre bas aage, nous reduire en estat que nous n'eussions plus arriuant à nostre Majorité que le nom de Roy & les apparences, & qu'il en eust en effet toute la Puissance & l'autorité. C'est veritablement la plus fauorable exception qu'on pourroit donner à la conduite qu'il a tenuë particulièrement depuis que les commandemēs de nos armées que nous luy auons confiez, luy ont fourny matiere d'y acquerir grande reputation & d'y faire quantité de creatures, & que d'ailleurs il s'est veu en possession de tant d'establissements considerables que nous luy auons donnez coup sur coup, pour l'obliger par gratitude à n'auoir d'autres pensées que celles de nous bien seruir. Mais bien loin de la reconnaissance que nous nous en estions promise : C'a esté alors qu'il a commencé à leuer le masque & à vouloir sur tout faire esclatter la grandeur de son credit, afin que personne ne prist plus d'autre voye que celle de recourir à luy pour obtenir des graces de Nous, ou pour éuiter le chastiment de quelque crime ; C'a esté a lors que les pratiques cachées qu'il auoit faites auparauant pour gagner à sa deuotion tous les Officiers de nos troupes, & notamment les Estrangers qui nous seruent (à quoy il auoit mis vn soin tout particulier) ont esté changées en des menées ouuertes pour se les acquerir & les rendre tout à fait dependans de luy : C'a esté alors qu'il a fait voir clairement que le bien de nostre seruice n'a iamais eu en son intention que la moindre part dans les actions de guerre qu'il a entreprises, puis qu'au plus pressant besoin que nos armes ayent iamais eu d'un Chef de sa condition & de son autorité pour suppléer à diuers manquemens restez de nos derniers desordres, il a éuité de s'engager au commandement de nos armées qu'il poursuinoit autrefois avec tant d'ardeur, afin de pouuoir s'appliquer tout



entier à la Cour & à ses caballes, croyant le temps propre arriué de cueillir le fruit qu'il s'étoit proposé, lors que toutes les Capagnes il hasardoit vn combat general sur cette maxime dont il s'est souuent expliqué, que gagnant la viétoire il augmentoit sa reputation, & auoit mesme de nouveaux pretextes plausibles de se faire donner d'autres recompenses; Et que la perdant, & nos affaires venans en suite à tomber en desordre, il en seroit d'autant plus considéré pour le besoin qu'on auroit de luy; C'a esté alors qu'il est deuenu liberal de caresses, plus qu'à son ordinaire, & qu'il a fait des recherches continuelles à tous les Gouverneurs de places, & à tous ceux qui possèdent des charges de quelque consequence, ou qui sont assurez par des suruiuanes ou par d'autres moyës d'y paruenir: Qu'il s'est engagé à nous presser pour tous les interests indifferemment de quiconque s'est adressé à luy, sans considerer s'ils estoient préiudiciables à l'Estat ou non: Qu'il a fomenté tous les mécontents: Qu'il a flaté leurs plaintes, & leur a promis de les assister: Qu'il a tasché de débaucher tous ceux qui par gratitude ou par affection s'attachoient à nous & à leur deuoir, diminuant le prix des graces qu'on leur auoit faites, ou leur voulant persuader qu'ils n'en pouuoient à l'auenir esperer aucune que par son moyen: C'a esté alors qu'il a exigé de ceux qui luy offroient seruice, vn serment de fidelité de le luy rendre au euglement enuers & contre tous sans exception de personnes ny de qualitez, & qu'il a persecuté ouuertement en diuerses manieres tous ceux qui ne sont pas voulus entrer avec luy dans cette dépendance: C'a esté alors que tout homme qui se donnoit à luy auoit le merite & les qualitez pourestre préféré sans difficulté à tout autre concurrent; Que ceux qui se tenoient dans leur deuoir sans autre vilée que de nous bien seruir, estoient tousiours des lâches & des gens de rien; Que ceux-cy mesmes deuenoient en vn instant de grands personages dignes de toute sorte d'emplois & de recompenses, dès qu'ils se déuoient à ses interests. Ce qui estoit vne voye feure de passer du néant au merite, & de l'inhabilité à la suffisance: Comme il estoit infallible d'acquérir son amitié & sa protection dès que l'on perdoit nos bonnes graces. C'a esté alors qu'il a fait des diligences sans nombre pour auoir à luy tous ceux qui auoient des charges dans nostre Maison, ou pour la garde de nostre personne: Qu'il a protégé ouuertement tous les delinquants, pourueu qu'ils recourussent à luy, quoy qu'ils eussent auant cela des attachemens contraires: Que la Maison a esté no-



toirement vn azile pour tous les crimes qui se commettoient. C'a esté alors qu'il a commencé à demander generally tout ce qui vaquoit de quelque nature qu'il peust-estre; Qu'en toutes occasions, autant petites que grandes, il a mis le marché à la main, & menacé de quitter tout, de se cantonner, & de se mettre à la teste de ceux qui seroient contre nous: En fin, ç'a esté alors que pour faire mieux paroistre sa puissance & sa fermeté pour les personnes qui entroient dans ses interets, il ne s'est pas contenté d'obtenir des graces, mais il a mieux aimé que le monde creust qu'il nous les arrachoit par violence. Témoin le Gouvernement du Pont-de-l'Arche qu'il voulut emporter de haute-lutte, & à iour nommé: sans quoy, il nous fit entendre qu'il alloit allumer vn nouveau feu dans l'Estat: Mais parce qu'il reconnut bien que la demande qu'il faisoit de cette Place estoit fort odieuse, & generally désaprouuée dans le monde, il publia d'abord qu'il ne poursuivoit la chose qu'à cause qu'il s'estoit engagé de parole au Duc de Longueuille de la luy faire auoir, declarant au reste qu'il ne seroit pas excusable, si estant comblé de nos bien-faits de toutes façons, & si ayant de plus grands establissemens qu'aucun Prince n'a eu en France depuis l'Origine de la Monarchie, il pretendoit iamais rié ny pour luy, ny pour les siens après cette affaire là acheuée. Nous nous portasmes donc encore dans cette occurrence là, à contenter son impetuosité, nonobstant la maniere dont il en auoit vſé, afin de luy oster tout pretexte de broüiller. Mais quoy que l'accommodement de cette affaire eust passé par les mains de nostre tres-cher Oncle le Duc d'Orleans, qui voulut en estre l'Entre-metteur pour conseruer la tranquillité publique; Il se trouua le lendemain qu'on n'auoit rien aduancé, & que ce n'estoit pas le mesme homme qui le soir d' auparauant auoit témoigné vne entiere satisfaction à nostre-dit Oncle, & donné sa parole de bien seruir. Il reprit le iour suiuant ses premieres froideurs, & témoigna disposition à faire pis, pour extorquer de nous quelques nouveaux avantages: ne se voulant plus souuenir de la Déclaration qu'il auoit solennellement renouuellée, de ne prétendre iamais rien après le Pont-de-l'Arche accordé. En fin, la Reyne lassée de tant de recheutes, & voulant, s'il estoit possible, couper pour vne bonne fois la racine de toute mes-intelligence, le fit presser de s'expliquer nettement de ce qu'il desiroit pour viure en repos, & dans son devoir: Sur quoy ayât déclaré qu'il auoit conceu de l'ombrage de quelques alliances, ( ausquelles neant-



moins il auoit non seulement dès le premiers iours qu'il en fut parlé, donné son consentement, mais les auoit conseillées luy-mesme six mois durant, comme les croyant fort vtils : ) Et ayant en outre témoigné souhaïter que la Reyne luy promist vne sincere & entiere affection ; Comme aussi de faire grande consideration des personnes qu'il luy recommanderoit dans les rencontres : Et enfin de lui dōner part generalemēt de tout ce qui se resoudroit en quelque matiere que ce peust-estre : La Reyne eut la bonté en premier lieu pour luy oster tout pretexte de dégoust & de méfiance de luy faire promettre qu'on ne conclurroit rien dans ces alliances là, que de cōcert avec lui ; Et quant aux deux autres points, elle y engagea d'autant plus librement sa parole, qu'elle ne se souuenoit pas d'y auoir iamais manqué, & croyoit même d'auoir plutôt panché du costé de l'excez que de l'obmission ; Mais on connut bien tost par son procedé à quel dessein il auoit exigé de la sorte des promesses non necessaires, & que son but en cela n'auoit esté autre, que d'auoir vn nouveau pretexte de les estendre à demander plus hardiment, & executer avec plus de hauteur tout ce qui lui tomberoit dans l'esprit, qui pūt seruir à aduancer son project de se rendre maistre absolu des forces de l'Estat : Et en effet à quatre iours de là, la correspondance dont il commença de payer la sincere affection que la Reyne lui auoit promise, avec toutes les solemnitez & seurtez qu'il auoit desirées, ne fut pas simplement de recevoir en sa protection ceux qui la luy demanderent contre elle, mais de l'offrir luy mesme à diuerses personnes qui auoient encouru nostre indignation, ou dès long-temps auparauant, ou pour des fautes qu'ils venoient de commettre. Nostre Cousin le Marschal de Schomberg se trouua bientoit apres en danger de la vie : on tient d'abord sur cet incident vn Conseil dans la famille dudit Prince, dont le resultat est de demander & d'emporter à quelque prix que ce soit le Gouuernement de Metz & pais Messin pour le Prince de Conty ; qui estoit d'ailleurs en traité pour auoir aussi l'Eueché de Mets. La Reyne nostre tres-honorée Dame & Mere est forcée par la folle conduite d'vn extrauagant, de le chasser hors de sa presence, ledit Prince prend aussi tost sa protection à descouvert, l'empesche de se retirer, veut mesme contraindre la Reyne à le reuoir, & par vn insupportable manquemēt de respect, qu'aucun François n'entendra sans vne indignatiō extreme : Il en vient iusqu'à menacer de prendre cēt estourdy dans sa maison, & de le mener tous les iours deuant la Reyne : Et si on n'eust esté obligé par prudence à lui faire



esperer que le temps racommoderoit cette affaire, & que luy mesme n'eust apprehendé de nuire à d'autres grandes pretentions qu'il poursuivoit en mesme temps, on eust couru risque de voir reduite nostre tres-honorée Dame & Mere, ou à souffrir de luy cette iniure, ou à se porter à toute extrémité pour s'en deffendre. Qui n'a point sçeu les differentes partialitez si prejudiciables au bien de l'Estat & de nostre service, qu'il a tesmoignées dans les derniers mouuements de Prouence & de Guyenne, où en deux affaires de mesme nature il vouloit en vn lieu releuer entierement l'autorité du Gouverneur à l'oppression du Parlement, & en l'autre faire directement le contraire, sans qu'il eust aucune autre raison d'vn proceder si different, qu'à cause que l'un des Gouverneurs estoit son parent, & qu'il n'aymoit pas l'autre: afin que par de semblables exemples de grand esclat, chacun venant à reconnoistre ce que coustoit son auersion, & ce que sa protection valloit, on ne songeât plus qu'à se départir de toute autre amitié & dependance pour se donner à luy sans reserve? Quelle autre patience que celle de la Reyne eut pû souffrir le Prince dans vn Conseil tenu en nostre presence, menacer de faire roïter de coups de baston dans Paris les Deputez de nostre Parlement de Prouence, parce qu'ils auoient osé faire plainte de la part de leur Corps, des mauuais traitemens qu'ils pretendoient leur estre faits par nostre Cousin le Comte d'Alais, contraires aux conditions de pacification que nous auions accordées à cette Prouince là? Quel moyen de tolerer plus longtemps la violence avec laquelle il auoit commencé de suffoquer la liberté de nos Conseils, par sa maniere d'agir impetueuse enuers les Ministres qui ont l'honneur d'y assister, dont presque aucun n'étoit plus exempt de menaces en particulier, ou d'affronts en public & en nostre presence mesme, quand leur conscience & leur deuoir les obligeoient à embrasser quelque aduis qui ne se trouuoit pas conforme à celuy dudit Prince? Sa moderation n'estoit pas plus grande dans les Gouvernemens que nous luy auons confiés: Ce n'estoit pas assez que tout ce qu'une grande Prouince comé la Bourgogne, fournissoit avec tant d'affection & de ponctualité pour nostre Espagne, fut entièrement abroché par luy & par les siens, s'il n'y eut encore exercé vne puissance qui faisoit gémir sous son oppression tous les particuliers, dont plusieurs ont esté forcez de nous faire des plaintes en secret & nous remontrer qu'il ne luy restoit plus à prendre que la qualité de Duc pour en estre le Souuerain. Nostre Prouince de Champagne ne receuoit pas de son frere vn plus rauo-



rable traitement, tous les Bourgs & Villages, & la pluspart des Vil-  
 les ayans esté tellement exposez, ou aux pillages des troupes qui  
 portent son nom, ou à l'avarice de ceux qui s'estoient emparez de  
 son esprit, pour obtenir des deslogemens que grand nombre de fa-  
 milles ont esté obligées d'abandonner les lieux de leur demeure,  
 pour se retirer aux pais estrangers circonuoisins. Avec quelles pa-  
 roles enfin expliquerons nous l'affaire du Havre, & les moyens  
 criminels qu'il a tenus pour s'emparer de cette place, l'une des  
 plus importantes du Royaume pour sa scituation, & sans contre-  
 dit la meilleure pour sa force? Apres auoir employé diuerses pra-  
 tiques pour seduire la iuennesse de nostre Cousin le Duc de Riche-  
 lieu, afin de luy faire espousser clandestinement vne femme qui  
 par diuers respects est entierement dans sa dependance, non con-  
 tent de nous auoir sensiblement offensé pour s'estre rendu avec le  
 Prince de Conty & la Duchesse de Longueuille sa sœur, les pro-  
 moteurs du mariage d'un Duc & Pair, pourueu d'une des princi-  
 pales charges de l'Estat sans nostre seu & sans nostre permission:  
 & d'auoir mesme voulu comme autoriser par leur presence vn  
 contract de cette nature prohibé par les loix du Royaume, comme  
 si ce n'estoit pas assez de s'estre emparé par cette voye illicite de la  
 personne d'un ieune homme, il le fait partir la mesme nuit de ses  
 nopces, luy donne pour conseil & pour conducteur, celuy des  
 siens qui auoit esté desia employé à le desbaucher, & le fait ietter  
 en diligence dans le Havre, afin de s'emparer aussi de cette place:  
 laquelle estant scituée à l'emboucheure de la riuier de Seine, luy  
 peut donner lieu de maistriser Rouen & Paris, tenir en sa suietion  
 tout le commerce de ces deux grandes villes, recevoir en un be-  
 soin des secours estrangers, & pouuoir introduire à point nommé  
 leurs forces dans le Royaume quand pour ses fins particulieres, il  
 auroit dessein de troubler l'Estat. Et d'autant qu'il iugea bien qu'il  
 y auroit aussi-tost nombre de Courriers depeschez vers ledit Duc  
 de Richelieu, pour luy faire connoistre en cette rencontre nostre  
 interest & le sien: Il en depesche plusieurs à l'instant pour faire ar-  
 rester en chemin les autres: violant en cela au plus haut point qu'on  
 peut concevoir, le respect, la fidelité & l'obeissance qui nous sont  
 deues. En suite de quoy, par vn attentat encore plus grand, la Reine  
 ayât enuoyé elle-mesme vne personne expresse à Sainte More qui  
 comandoit dans le Havre pour lui porter ses ordres dans vn euene-  
 ment de si haute consequence, & luy faire entendre l'obligation  
 qu'il auoit de nous conseruer la place sans y souffrir aucun change-



ment: Il n'en fut pas plustost auerti qu'il depesche vn autre Courrier, & mande qu'on iette dans la mer avec vne pierre au col la personne qui arriueroit chargée des ordres de la Reine: & cela avec vne telle presumption & vn si grand mespris de nostre autorité, qu'il a esté le premier à s'en vanter hautement. Enfin, pour nous oster par diuers moyens toute disposition de cette place: il fait partir en diligence la Dame mesme qui luy auoit l'obligation recente de son mariage, luy fournit de l'argent pour gagner de plus en plus l'esprit du ieune Duc, en enuoye encore par d'autres voyes pour le payement de la garnison, afin de s'acquérir les Officiers & les soldats qui la composent: & pour y auoir, outre tout cela, d'autres gens plus à sa deuotion, & qui luy fussent connus, il fait accompagner ladite Dame de bon nombre d'hommes à cheual qui s'y sont iettez, faisant courir le bruit qu'on auoit dessein de l'enleuer en chemin. Tant d'entreprises sur la puissance Royale, dont cette derniere seule du Havre est digne d'un chastiment rigoureux, ne nous ont plus laissé aucun lieu de douter des pernicious desseins de nostredit Cousin, non plus que de la hardiesse qu'il eust eue à les executer, si nous n'y eussions apporté à temps vn remede proportionné à la grandeur du mal. Cependant, afin que vous soyez informez aussi des nouueaux moyens qu'il meditoit pour pouffer son proiet en auant, & des traualx qu'il nous preparoit encore, & que nous auons preuenus par sa detention: Voicy ce qui estoit en dernier lieu sur le tapis. Il traitoit avec l'Ambassadeur de Mantouë pour l'achat de la place & de la Principauté de Charleuille, non seulement sans nostre permission, mais contre le refus exprez que nous luy en auons tousiours fait: & par ce que nous auons adroitement fait naistre entr'eux des difficultez sur le prix, le sieur Perault auoit depuis peu déclaré audit Ambassadeur, que son Maistre depescheroit dans peu de iours à Mantouë vne personne expresse pour conclure l'affaire avec le Duc mesme. Sur quelques oppositions qui auoient esté formées à la iouissance de Clermont & des Domaines des enuironz (quoy que faciles à surmonter comme il a paru depuis) ledit Prince s'estoit desia laissé entendre que s'il y estoit troublé, il falloit luy donner la place de Sedan, & tout le Domaine qui en depend, qui a esté par nous recompensé à nostre Cousin le Duc de Bouillon de la valeur de beaucoup de millions. Des personnes dependantes de luy, auoient introduit presentement vne negociation avec le sieur d'Aiguebère pour l'achat du Gouvernement de Mont Olimpe, qu'il faisoit estat de payer de



son propre argent pour le faire tomber entre les mains de quel-  
 qu'un des siens, afin qu'il n'y eust plus de place en Bourgogne  
 qui ne fust à luy hors Chalons: Il nous pressoit d'acheter duieur  
 Plessis Bezançon à nos despens le Gouvernement des ville & ci-  
 tadelle d'Auxonne pour vne de ses creatures: Il auoit mesme re-  
 doublé depuis peu les diligences qu'il a tousiours employées pour  
 faire reüssir le mariage du Marquis de la Moussaye avec la fille du  
 sieur d'Erlac Gouverneur de Brissac, afin d'auoir encore cette pla-  
 ce impo- tante à sa deuotion, quoy qu'en cela comme en toute autre  
 chose, nous ayons tout suiet de nous loüer de la conduite & de la fi-  
 delité dudit sieur d'Erlac. Nous auons esté aussi auertis de diuers  
 endroits qu'il faisoit traicter quelques autres mariages, pour met-  
 tre par ce moyen dans sa dépendance des principales charges du  
 Royaume & bon nombre de places de grande cōsideration. Il auoit  
 fait venir à la Cour malgré toutes ses incommoditez nostre cousin  
 le Marechal de Brezé, pour se ioindre ensemble à demander en-  
 cor la charge de Chef & Surintendant des Mers, de laquelle, quoy  
 que l'un ny l'autre ne puissent y auoir l'ombre seulement imagi-  
 naire d'aucun droit, ledit Prince a esté desia recompensé deux fois  
 comme nous auons dit, & ledit Marechal a esté gratifié encor en  
 cette consideration apres la mort de son fils de trente-trois mille  
 liures à prendre annuellement sur les droicts d'Ancrege, qui  
 sont les plus clairs deniers de ladite charge. En outre, bien que  
 ledit Marechal ait tiré depuis quelque mois par nostre grace &  
 permission cent mille escus de sa demission du Gouvernement  
 d'Aniou, & que toutes les seuretez ayent esté prises pour faire  
 que cette somme vienne apres sa mort à nostre Cousin le Duc  
 d'Anghien, lesdits Prince & Marechal auoient encore dessein  
 de nous presser tous deux de donner la suruiuance du gouuer-  
 nement de Saumur au Duc Danghien; Et cela estant accordé,  
 nous sçauons que ledit Prince pour se rendre tousiours plus  
 considerable dans ses Gouvernemens & dans ses charges  
 auoit resolu de nous faire les dernieres instances pour empor-  
 ter tout d'un coup en faueur de son Fils âgé seulement de six  
 ans, tout ce generalement que nous auons donné en diuers  
 temps à feu son Pere & à luy. Quand nous n'eussions point esté  
 touchez des preiudices & des perils cy-dessus exprimez qui  
 nous menaçoient, où nous pourrions mesme en adiouster beau-  
 coup d'autres que pour certaines considerations & circonstan-  
 ces, il n'est pas à propos de donner au public; Il s'est rencontré  
 que tout ce que nous auons de fideles seruiteurs dans nostre



Conseil & au dehors, nous ont représenté en mesme temps qu'une plus longue patience rendroit bien tost le mal sans remede, & que l'ynique moyen d'en garantir nostre Estat, aussi bien que nostre personne, estoit de faire arrester nosdits Cousins, qui tenans tous les iours des Conseils de famille pour l'establissement de cette puissance qu'ils vouloient opposer à la nostre, n'auoient pas honte de compter entre les moyens d'y paruenir, outre les grandes charges, & les gouuernemens des Prouinces qui sont à eux ou dans leur dépendance, qu'ils estoient desia maistres de toutes les grandes riuieres du Royaume, par les diuerses places qu'ils ont entre leurs mains, ou qu'ils croyoient auoir à leur deuotion sur les riuieres de Seine, de Meuse, de Saône, du Rhosne, de Loire, de Garonne & de Dordogne. En fin, pour renouueller si on eust peu en ces temps-cy l'exemple des anciennes puissances qui ont fait passer autresfois ceux qui les ont eues d'un estat particulier à la Royauté. Et afin que l'autorité que ledit Prince a desia enuahie fust encore accruë notablement, estant appuyée sur vn pouuoir legitime emané de nous, Il poursuiuoit viuement pour se faire donner l'espée de Connestable ( quoy que la charge ayr esté supprimée ) laquelle jointe au baston de Grand Maistre, & à l'Amirauté dont il ne tenoit la poursuite en surseance que iusqu'à ce qu'il eust esté créé Connestable : Il eust eu par l'une, nostre Maison & tous nos domestiques sous son pouuoir : Par l'autre, le commandement general sur tous les gens de guerre de nostre Royaume : & par la troisiéme, la puissance absolue sur la Mer & sur les Costes. Et comme nous luy auions fait représenter touchant l'espée de Connestable que nostre tres-cher Oncle le Duc d'Orleans auroit grand sujet d'en estre offensé pour l'interest de la charge qu'il a de nostre Lieutenant general en toutes nos armées & Prouinces : Il demandoit maintenant que nous en fissions expedier les provisions sans le sceu de nostredit Oncle, pour les tenir secretes iusqu'à ce qu'il eust pû le luy faire trouuer bon, ou plustost iusqu'à ce que les desseins qu'il meditoit luy donnassent lieu de soustenir l'affaire hautement quelque desordre qu'il en pût arriuer. Cependât, pour se mettre mieux en estat de nous violenter en toutes choses : En mesme temps qu'il faisoit des poursuites si extraordinaires, il demandoit avec grande instance sous diuers pretextes qu'on fist aprocher de ces quartiers-cy les troupes qui portent son nom, ou qui en depend, lesquelles seules sont capables de composer vn Corps d'armée : sans auoir égard que la pluspart sont employées



pour nostre seruice & pour la defense de l'Estat, en diuers lieux fort éloignez: Circonstance que nous estimons digne de tres-grande reflexion, aussi bien que celle des fortifications de Stenay & de Clermont, où on traualloit incessamment à ses despens: Comme encor le prix fait depuis vn mois à deux cens mille francs pour fortifier Bellegarde. N'estant gueres à presumer qu'à moins d'auoir des pensées & des desseins tout à fait extraordinaires, il eust voulu employer son propre argent à rendre plus forte les places qui sont desia de soy en tres-bon estat, & qui ne sont menacées d'aucun ennemy. Nous auons par beaucoup de respects dissimulé nos iustes ressentimens iusqu'à vne telle extremité, que nous sommes asseurez que le monde jugera que nous auons trop hazardé par nostre patience. Il est vray que nous esperoins tousiours que la prudence que nostredit Cousin pourroit acquerir par l'âge, modereroit cette grande ardeur: Ou que tant de biens faits sans exemple dont nous l'auions comblé, l'obligeroient à se tenir par gratitude dans les termes de son deuoir: Mais ayans au contraire veu les choses reduites entels termes qu'il falloit se resoudre, ou à luy accorder tout ( & par cette voye nous aurions esté bien tost depouüillez ) ou à le luy refuser ( & nous l'aurions veu bien-tost les armes à la main contre nous mesmes ) voyans d'ailleurs que la profusion de nos graces ne seruoit plus qu'à luy en faire tous les iours pretendre de nouuelles: qu'une plus longue tollerance seroit la perte infaillible de l'Estat, si on ne trouuoit bien-tost quelque moyen d'arrester la course violente de ce Torrent qui n'auoit plus de digues qu'il ne rompist pour tout inonder: Et ayans enfin remarqué depuis quelque temps, que les avis que nous receuions de quelque endroit generalement que ce fust des païs estrangers, s'accordoient tous à dire que le plus veritable sujet de l'auersion que les Espagnols tesmoignent à la conclusion de la paix, procede de ce qu'ils veulent voir auparauant à quoy aboutiront les desseins & les actions du Prince de Condé, qui va ( disoient ils ) s'emparant tous les jours des principales forces de l'Estat, & de l'autorité, ce qui ne peut pas tarder, ou de produire vne guerre Ciuile dans ce Royaume, où de causer le bouleuersement de cette Monarchie: Nous auons estimé que ce seroit déffailir à Dieu qui nous a commis le regime de cét Estat, à nous mesmes, & au bien & repos de nos sujets, si nous n'apporions sans plus de delay, remede à vn mal deuenü deormais si pressant, qu'il eust pû estât negligé donner bien-tost vn coup fatal à l'Estat. No vs auons donc resolu par l'auis de la Reine Regente nostre tres-honorée Dame & Mere, de nous asseurer de la personne de nostredit Cousin le Prince



de Condé : comme aussi de celle de nostre Cousin le Prince de Conty, complice presentement de tous les desseins de son frere, & qui depuis nostre retour à Paris a incessamment visé & concouru par sa conduite à toutes ces mesmes fins. Quant à nostre Cousin le Duc de Longueville, nous nous estions promis que le grand nombre de graces que nous luy auons accordées, soit en places, soit en honneurs ou en biens, & que nous auons mesmes de beaucoup augmentées depuis nos dernieres Declarations de paix, l'obligeroient suivant ses promesses & son deuoir à procurer de toute sa puissance, le repos de la Prouince que nous luy auons confiée, & le bien de nostre seruice dans le reste de l'Estat : Mais nous auons remarqué depuis ce temps-là, qu'il n'a rien obmis d'extraordinaire & d'injuste, pour acquerir dans son Gouvernement vn credit redoutable : Qu'il ne s'est pas contenté d'y posseder diuerses places tres-considerables, dont l'une a esté arrachée de nous en dernier lieu par les artifices que chacun a veus : Ny de voir presque toutes les autres, aussi bien que les principales charges de la Prouince, entre les mains de ses dépendans : Qu'il ne s'est pas contenté d'auoir joint à la charge de Gouverneur en chef, celles de Bailly de Roüen & de Caën, pour auoir vn prétexte apparemment legitime de troubler la fonction de nos Iuges ordinaires, & par ce moyen vsurper vne nouuelle autorité dans la Iustice aussi bien que dans les armes : Et enfin, Qu'il ne s'est pas contenté de faire traualler ouuertement les emissaires pour débaucher l'esprit de nos fideles sujets, & attirer dans sa dépendance tous ceux qui ont tesmoigné affection pour nostre seruice, n'ayant pas fait scrupule de les menacer d'une entiere ruine s'ils refusoient plus long-temps d'espouser aueuglement toutes ses passions : Mais aussi qu'il a eu part dans les conseils & principaux desseins de nosdits Cousins les Princes de Condé & de Conty, & qu'il a presque tousiours assisté aux deliberations tenues dans leur famille pour l'establissement & augmentation de leur commune grandeur, & d'une puissance legitiment suspecte à celle que Dieu nous a donnée dans nostre Royaume. Et d'ailleurs que les siens disoient desia insolemment dans sa maison, que si l'année dernière, il ne pût venir à bout du Havre tout seul, tous ensemble auoient enfin fait le coup. En suite dequoy on deuoit l'appeller d'oresnauant Duc de Normandie, ne luy restant pas à beaucoup prez tant de chemin à faire pour aller à la Souueraineté qu'il en auoit fait pour paruenir à l'excez du pouuoir & des forces qu'il auoit dans la Prouince : Voyans en effect qu'il començoit à exercer diuers actes de cette pretendue Souueraineté par des desobeissances formelles à



nos ordres: tesmoin le refus qui fut faict il n'y a que peu de iours au Pont de l'Arche de receuoir les compagnies de Gens-d'armes & de Cheuaux legers de nostre garde, quoy qu'il n'y eust que peu de iours que nous l'auions mis en possession de ladite place, & qu'il y eust vn ordre exprez, signé de nous pour les y faire loger; Nous auons esté aussi contrainct par tant de respects de nous asseurer de la personne de nostre-dit Cousin le Duc de Longueuille. Cependant, Nous voulons bien vous faire scauoir qu'encores que tous ces perils dōt nostre Royaume estoit menacé, fussent si grands, & si pressans que ç'a esté presque desfaillir au deuoir d'un bon Roy, d'auoir differé iusqu'à present les remedes necessaires pour l'en garentir: Neantmoins l'amour que nous auons pour la Iustice, & l'apprehension qu'on ne nous imputast d'en vouloir arrester le cours pour d'autres fins, nous a fait tenir toutes choses en suspend mesmes avec beaucoup de hazard, pour vous donner le temps d'acheuer le procez que vous auiez commencé par nostre ordre & à la requeste du Procureur General contre tous ceux qui se trouueront coupables de la sedition qui fut excitée l'onzième Décembre dernier, ou de l'entreprise faite contre la personne dudit Prince, que Nous voulons estre continué par vous sans interruption selon la rigueur de nos Ordonnances. Mais ayant sceu d'un costé que ledit Prince auoit fait approcher de lui plusieurs Gentils-hommes de sa dépendance, des Officiers de ses troupes & que des plus confidens s'estoient laissez entendre qu'il méditoit quelque grand dessein, qui ne pouuoit estre qu'au preiudice de nostre autorité & du repos de nos sujets, puis qu'il ne nous en donnoit aucune connoissance: Ayans mesme d'ailleurs receu des auis certains qu'il se preparoit à se retirer dans son Gouuernement en diligence & sans nostre congé, aussi-tost qu'il verroit que les choses ne passeroient pas entierement selon son desir parmy vous, afin d'y faire esclorre avec plus de seurte les resolutions formées de longue main dans son esprit: Et que de concert avec luy lesdits Princes de Conty & Duc de Longueuille se deuoient aussi rendre en mesme temps dans leurs Gouuernemens, il n'a plus esté en nostre pouuoir d'yfer de remise, & nous auons esté forcez pour le repos de nostre Estat, de passer par dessus toute autre consideration & de nous asseurer de leurs personnes sans plus de delay. Et d'autant que leurs partisans & ceux qui vont sans cesse cherchant les occasions de broüiller pourroient essayer de donner quelque mauuaise interpretation à vne resolution si iuste & si necessaire pour le repos & salut de nostre Estat, que nostre deuoir nous oblige de preferer à toute autre chose: Nous declaron



n'auoir aucune intention de rien faire contre nostre Declaration du  
 vingt-deuxiesme Octobre 1648. ny contre celles du mois de Mars  
 1649. & autres que nous auons fait publier depuis pour la pacification  
 des troubles passez, tant de nostre bonne ville de Paris & de la Nor-  
 mandie que de Prouence & de Guienne : Lesquelles nous voulons  
 & entendons deuoir demeurer en leur force & vertu, en tous les  
 chefs qu'elles contiennent. CAR tel est nostre plaisir, donné à Paris  
 le 19. Ianuier 1650. Signé LOVYS : & plus bas par le Roy & la Reyne  
 Regente sa Mere presente : DE GYNEGAUD.